

三長物齋文略

三長物齋文略卷三

寧鄉黃本驥仲良著

花甲重周第十圖記

長安古名勝地城南爲最終南在望鴈塔雙幘樂游少陵諸原曲江樊川諸水縈迴映帶於其間所謂城南韋杜去天五尺也吾鄉唐陶山先生開藩陝右以重九前一日爲七十覽揆幕中諸君邀集慈恩塔院煮茗爲壽是日也南山雪霽馬首占晴楓徑停車霜葉如赭周君雨香爲繪花甲重周第十圖圖中凡十有六人峻塔長松鬱蒼相間爲兩列塔前列者先生褒衣博帶手攜垂

髻居其中兩僮夾侍一操杖一負花籠其左采菊而頤
然長者爲艾聲和右擷芝而微笑者爲戴惜初與惜初
竝立者驥也驥前爲徐松溪後爲唐敬之松陰列者中
爲遲客寺僧其左拈桂華而年最少爲蔡臺生臺生前
爲其兄曼受與曼受竝立隱身紅樹間爲雨香迴而與
雨香對者車秋舫也其右授拏佛手柑者爲沈石樵石
樵之後白髭方袍爲郭尙齋尙齋名逢錦巴陵人聲和
名呂惜初名凝之皆上元人松溪名桓陽湖人石樵名
梧仁和人臺生名踵武吳縣人垂髻者咸寧唐大令之
子名明行萬載人敬之名釗先生從子曼受見第六圖

秋舫雨香見第七圖故不著其名貫驥首爲紀游長律
三章先生和之同游諸君及能詩而未偕游者亦和之
得詩近百首別刊城南秋眺錄命驥記其事書於圖之
左方時道光壬午季秋也

終南訪碑圖記

關中爲金石之藏終南一山西起秦隴連亘長安咸寧
盤屋鄠杜之南而東抵於藍田縣延盤踞幾八百餘里
又爲關中藏寶之所會歸其中古金貞石之沈埋於荒
煙蔓草間者不知凡幾前明趙子函生長其地頗以喜
事自負其於此山僅作三日遊所得舊碑不及十種而

石墨鐫華之著流傳至今已幾幾與南山共壽車君秋
舫以江南才士囊硯遊秦好古之癖遠過前人視子函
遺冊爲筆鋒藍縷未足以窮陸海之勝嘗於春秋佳日
具饌糧召徒侶凡丹崖翠嶂古墓叢祠猿鶴之所栖樵
牧之所憩苟可以得寸金片石者皆爲履齒所必到因
乞小蓬王君爲作終南訪碑圖而屬余爲之記夫物聚
於所好歐陽子嘗言之余謂所好之聚亦視其物爲何
如耳衛懿公好鶴鄭子臧好聚鵠冠秦皇漢武好神仙
彼以君公之貴非所當好終有難聚之物況吾輩一二
寒賤必欲探渤海之奇珍發元圃之祕蘊其能得乎然

未可與訪碑之舉同日語也碑刻之傳可以詮經可以証史非僅耳目玩好之具正爲吾輩之所當好秋舫行矣他日芒鞋踏破翠墨盈囊不獨子函三日之遊難與比數卽歐趙洪薛諸家竭數十年心力著爲專書亦不足以擅名山之藏而誇金匱石室之富則此圖之作其亦山靈有幸寶藏勃興之會也夫

雲深山房記

湘潭李畏齋善岐黃自號醫隱於宅西半里許築茅屋一椽取樊川詩意名曰雲深山房四面皆山蒼翠如屏障前有方塘環以水田十畝顏其堂曰十畝之間志隱

契也每當春秋佳日與二三朋輩把酒賦詩坐花垂釣
或與野老田夫樵童牧豎隔離問訊閒話片時暇日居
息靜軒中明窗淨几手錄方書隙圃閒畦自鋤藥種比
鄰有求醫者輒就山房診之百里內外造門延請亦惟
視其禮意之誠否間一往治如璽印泥如匙勘鑰無不
立效否則厚幣強求未嘗應也余思世所謂醫者自以
爲盧扁復生出則盛服高車非朱門重聘不入其於難
經脈訣亦能究舉其辭而一藥甫投如操徐夫人匕首
血纔濡縷卽能殺人是豈所業之未精耶抑亦利令智
昏方東家切脈時而意已火馳西去也惟醫隱隱於醫

直寄於醫耳力田逢年衣食無累白雲深處吾愛吾廬
有求醫者卽以醫寄之雖戶外屨滿而其中卒落然都
無一事也故曰寄也辛未季春偶館余寓乞爲文以張
之走筆書此於雲山佳境可無唐突否也

三長物齋記

余舊名齋曰式相好自余兄花耘先生卽世不忍復稱
是名因易之曰三長物齋三長物何物也余不能書而
嗜古人之書集秦漢以來金石文字數百種爲長物一
嘗學琴於湖州沈山人不耐竟學而止蓄舊琴及支琴
輒各一爲長物二囊無一錢而有周秦刀布數十品人

三長物齋後記
以爲廢銅匣而藏之若拱壁爲長物三然則長物止此
乎馳逐名場三十年而名不成有志讀書而未暇吾身
亦長物也何止於三第以三者皆有用之物適與頑然
之軀相遭而辱爲長物則以三長物名吾齋也宜矣

三長物齋後記

既以三長物名吾齋矣搜索齋中復得三物一自製溪
州石磬聞客談猥俗鏗然一擊耳爲之清一歷朝尺式
自唐虞至

國朝靡不備世有挾贗骨董者不能欺以長短一雲陽
樓看山冊雲陽長沙市樓也乙酉重九後四日集名流

歎此以詩畫見貽者彙爲巨冊用識友朋山水之樂夫
天下之物足供嗜好者豈有窮乎今旣累三爲六矣由
此而十而百而千萬皆長物也皆可作三長物觀也故
仍其名曰三長物齋而著所由推廣之義於後云

琴瓢記

山西古帝都爲虞夏典樂之邦平陽之洪洞則晉師曠
故里及祠墓在焉論古樂者莫盛於此余壬午秋客其
地得琴瓢一雖未必爲夔曠遺物然形制古朴非近代
所能倣製也時同邑丁禮門先生官岳陽不惜馬力爲
余駝歸適中表弟唐敬之以舊琴見贈文斃焦桐兩美

畢具因記其事於軫腹道光甲申季秋長沙黃本驥記
武陵陳霖僊書 篆書

附題跋

琴之合甚思之

古篆書

列女傳藏孫臆語長白松峻

爲虎癡題

草書

良夜氣清竹露如雨幾潤琴和冷

然太古抱樵居士同素生觀并書

正書

汾之陰獲

輒半尋歸以薦琴流響愔愔是將鼓黃鐘之宮而應

以心者耶

子言

行書

以上右方

虎癡香雪文字之友素琴在御貞吉无咎

隸書

甲申

小春十有二日桐城朱彪嘯厓氏題銘於樂石吉金

寓館并誌

行書

何以寫心清琴橫床我之懷人遙

遇三湘

拈花居士集陶

正書

璞古非斲耶桐孤

有託耶其兩美之合耶

僮陽呂麗堂

行書

築屋

松下眠琴綠陰脫巾獨步如見道心

香伯

草書集

詩品

璞齋錢璽觀

湘侍

正書

以上上方

臣叔殊不癡

婉璫謹識

正書

邀素心佇涼月靜

琴張清籟發

大驤

草書

嘉斯器之懿茂含至德

之和平

隸書集稿叔夜琴賦

趙修梅書

闕雲山同

觀

正書

雪夜敲冰霜天擊磬

周安邵

行書

比

德於玉叶韻於琴

李沆訓觀并書

正書

質吾湯

蟠同弟小浯護又村爨過頤園琴詒護記

行書

相

賞有松石間意

霍舟陳瀾

行書

以上下方

昔傳趙管今見黃陳瀟湘秀氣鍾於斯人

道光五

年元旦湘林觀并識

正書

秀水病霍生談及汾霍

舊游對此如見故人

行書

丹崖劉之屏觀

行書

筠坡蔣竹觀

正書

星沙陳象文刻字

正書

乙亥

二月啟瑞手拓訖并識 以上左方

琴瓢後記

物之顯晦豈有定哉是瓢余見之於山西李氏廢園中
用薦蒔花之盎以其中空而外饌也知爲昔人支琴之

具乞以歸里記其事而屬內子香雪書之一時好事利
子題名殆遍斯亦極陶族氏之榮遇矣余所藏金石文
字有西漢五鳳二年甄刻至今尙存然則斯甄之壽未
可限量更歷數百十年不知落於誰氏之手其或免爲
薦盎之斃則諸君子品題之力也第所題有書名者有
書字號若別號者恐久而失傳續爲是記鐫於甄背俾
諸君子姓名里居得與斯甄並壽不獨頑劣如愚夫婦
者得以濫廁於其間也記中所及者二人禮門先生名
公路敬之善化人名釗右方題名者四人鶴林松峻滿
洲內務府人抱樵居士湘潭張君家桀也素生歸安沈

君堅子言上元陳君元富上方題名者六人嘯崖自署
名貫不重記拈花居士黔陽長王香杜夫子也夫子名
金策諸城人麗堂太守原名士澤改名恩湛僮陽今海
州地香伯邵君梅臣湖州人樸齋丹徒人湘其長君也
下方題名者十人婉璠余兄子適瀏陽歐陽氏大驤香
雪兄嶽雲名也修梅名秉禮大興人雲山名嵐桐城人
節庵周君衡山人彝卿李君沅陵人三錫善化人鶴舟
上元人自節庵以下名皆自署左右題名者七人湘林
郡伯名薩迎阿滿洲鑲黃旗人病鶴生沈君光熙也丹
崖茶陵人鈞坡漢軍鑲白旗人鐫字之陳象文長沙人

啟瑞龍君翰臣名桂林人前題皆道光四五年刻此則
十有九年補題也合之得二十有九人此二十九人者
或以政事或以文章或以技藝皆自有可傳不藉甄文
而顯余嘗游長安花塔寺得唐人造像記十餘紙皆佞
佛之文無足取檢其中有姚元之一記卽開元相文獻
公崇未遇時手筆也藏之若重寶後之視斯甄者其亦
有德望如文獻者令人珍賞之不置耶甄之顯晦不足
道是則余與諸君子所當共勉焉者也

歷朝尺式記

前漢書廷尉掌五度度者分寸尺丈引也十分爲寸十

寸爲尺十尺爲丈十丈爲引古人審度其稱不一如一
髮爲程十程爲分五寸爲耜八寸爲咫尺有三寸爲矩
二尺二寸爲幅三尺爲武又爲跬又爲柯四尺爲仞五
尺爲墨又爲几六尺爲步又爲弓七尺爲軌八尺爲尋
九尺爲筵一丈爲板一丈六尺爲常丈有八尺爲制二
丈爲端三丈爲雉四丈爲兩亦爲端又爲匹五丈爲堵
此長短異名也公羊傳注側手爲膚按指爲寸禮投壺
注鋪四指爲扶一指按寸大戴禮布指知寸布手知尺
舒肱知尋此古人制尺之原也蔡邕獨斷夏十寸爲尺
殷九寸爲尺周八寸爲尺通鑑外紀禹十寸爲尺湯十

二寸爲尺武王八寸爲尺陳祥道曰周法十寸九寸皆爲尺攷工記十寸尺也王制八寸尺也此古人用尺之異漢劉歆有銅斛尺光武帝有建武銅尺章帝時冷道舜祠下得玉律度以爲尺謂之漢官尺又建初六年造慮魄銅尺晉始平間得古銅尺隋書有十五等尺曰周尺晉田父尺梁表尺漢官尺魏尺晉後尺魏前尺中尺後尺東魏後尺蔡邕銅籥尺朱氏尺隋水尺雜尺梁俗間尺此自周至隋尺制之異年代旣遠古尺無存今就各家考訂歷朝尺制及

其式俾知一朝有一朝之尺未可渾同考定古器當用古尺記載今器當用今尺庶不致有毫釐千里之差

雙陸局記

雙陸之戲始於西竺其局彼此內外各有六梁至魏陳思王植始置二投蓋取投擲之義卽今骰子所託始也其戲盛行於齊梁陳隋間如梁蕭賁與湘東王繹雙陸食子未下賁曰殿下都無下意繹深銜之是也至唐狄梁公與張昌宗賭集翠裘中宗爲韋后及武三思黜竊遂爲宮壘之戲宋太祖有雙陸詩紀于奎文閣其時猶以此供御洪景廬雙陸圖序云閱時旣久中州泯泯罕

見而殊方偏澤類能爲之蓋南宋以後博具益精此戲
遂不甚傳而湖湘以南見者尤少嘗閱唐子畏譜雙序
云垓不可虛門不可啟敵不可縱家不可失積則量輕
重遲則計緩速推其術可以用兵并可以論文心竊好
之而未及一見壬午秋游山西於洪洞劉氏得之仿爲
一局傳之好事者以存近古雅戲博弈猶賢或亦大雅
之所不廢云

我我圖說

天下之最難識者我也世之以貌相人者輒曰某人之
眉目似某某人之鬚頰似某斷無有曰某人似我我似

某人者世豈無似我之人哉人似我我似人皆不得而識也故曰明足以察秋毫而遺於眉睫此特外貌焉爾若夫中藏則尤甚我能知眾人之賢否而於我之賢否則惜焉不知是非不識我之明驗乎夫孔子無我楊子爲我聖學異端公私雖判要其立教無不自我始此雲山闕翁我我圖之所猶作也圖中一人獨立引鏡自照其面以爲圖中人我也鏡中人亦我也我與人相值而無不識之人我與我相值庶幾無難識之我乎或曰難之曰鏡中之我有定形哉總角而姣好者少小之我也鬢鬢而有鬚者壯盛之我也齒頰而髮禿者衰老之我

也執鏡以求我得無隨時而異乎翁曰無慮也形之無
定者時爲之非我爲之也我有所戚額爲之蹙我有所
畏色爲之沮我有所愧顏爲之赧吾之爲是圖也將以
自鏡其心之有所戚有所畏有所愧焉否耳若以形論
東施嫫母非不日臨妝鏡也亦豈知己貌之不若西子
哉是則我我之說也余曰善爲援筆而書於冊末

觀我圖說

儒家之言曰觀我生佛家之言曰觀自在不知我之所
以生卽不知自之所由在其說雖殊其義一也南溟朱
君以觀我名其圖圖中一人獨立引鏡自照其面與雙

山關翁之圖略同而名特異一日持以示余且指圖中
人曰似我否余笑而復之曰君方不知圖中之人似我
又安知鏡中之我可觀耶夫我有我之真以心而不以
迹也以神而不以形也心與神百年不斂之我也形與
迹易化速朽之我也圖中之我鏡中之我皆形也迹也
非真我也世有能強記者半面之識一日之緣雖歷數
十寒暑於稠人廣坐中一望而知其爲某某至於我之
面目口鼻眉耳腮頰則生初備具者其相聚之久非翅
半面一日已也設有人焉與我絕相類旁觀者皆曰某
似君我反懵然不知其人之似我也觀人以貌不能無

失觀我以貌其又可據耶曰吾恃有鏡在夫鏡亦安可恃哉孔子陽貨貌之相似者也使陽貨而臨鏡必不曰我似孔子陰險之心異而不知其貌同也西施嫫母貌之絕不相似者也使嫫母而臨鏡必將曰我似西施嫫媚之心同而不知其貌異也夫鏡亦安可恃哉故古之儒者由觀我以觀民是爲成已成物之學而佛家於觀自在之外亦有所謂觀世音者觀世卽觀民也朱君善用其觀裂圖去鏡而真我出焉慎無使鏡中之我爲孔子爲西施而恃鏡者爲陽貨嫫母焉則庶幾矣

嘉善徐君與黔西橡鰭說

朝廷設官凡以爲民也或以利小而不必爲或以官卑而不能爲故設官雖衆而有益於民者卒少然利之大者往往由纖細而興官之尊者或不能久於其任欲興一利民難遍喻以致旋興而旋廢不若利小則用力不勞推而行之易於久遠官卑則身與民近指而導之易於率從要非具大本領負大經濟者不能感孚甚速而流譽於無窮也若嘉善徐君興橡繭之利於黔之正安是實有益於民者也君之階一吏目耳由吏目而上正從之階凡十數級孰不欲爲民興無窮之利然利未興而害輒隨之即使無害亦且流弊百出阻撓萬端非利

之不可興也蓋所興之利非切中民要以好名之心干
違道之譽故其利善剝而不善因而其名亦可暫而不
可久橡繭之利因其土宜橡故教民種橡因橡之宜於
蠶也故教民飼蠶而衣被之利遂及四方使必泥前人
九州之士皆可蠶桑之說謂次充治桂陽課民種桑黔
西之士獨不可桑乎是猶強民所難而非因民之利而
利之也且橡之爲類見於經典者曰栩曰櫟曰柞曰杼
皆是物也其材可爲薪炭其芽可代茗飲其實可供染
帛之用可療腸胃之疾可充儉歲之糧獨未聞其葉可
以飼蠶自徐君興一利而百利具焉豈僅遵義橡繭得

興吳越桑絲比價平宜其慶流後裔占籍於黔楚浙三省者皆科名鼎盛而黔人之食其利者於百餘年後猶尸而祝之既私祀於杜復敦請於

朝專祀名宦以報其功是非具大本領負大經濟其能因一時興利而能成不朽之令名乎君名階平字荀介生平行事具新化鄧君顯鶴所撰神道碑銘不具述

青塘山居圖說

青塘山在長沙郡治東南九十里地介湘潭善化之交山下二塘表延數十畝又東四五里則荻舟凌君十有五世族居之所其祖紹山隱君始建別業北域存焉尊

甫偉人贈君復營壙於此今岡谷紫紆茅茨在望者卽
所謂青塘山居也近日仕宦者流輒掌風塵輒思閑退
往往於從公之暇繪遂初之圖究之林下無人不免爲
識者所謂荻舟年未強仕當水部試政之始正雲程發
軔之初方將歷玉堂排金闕操得爲之柄展有用之才
入爲文墨侍從之臣出膺封疆倚畀之任盡行所學何
用不臧乃復依依於先人邱墓之鄉營營於童子釣游
之地屬同里湯君小潛爲寫此圖廣徵題詠或者不察
謂其無心出岫未倦知還以爲荻舟之用意在是是豈
足爲荻舟知己耶余與荻舟交最密知之最深其初以

經學受知於南海吳荷屋中丞繼以制科拔萃黨序奪
幟鄉闈近復以師儒之席見重於長白裕餘山宮保一
時名公鉅卿莫不求識願鄰忘分推許非謂塵視軒冕
癖戀煙蘿遂足以見荻舟之素蘊也荻舟之學於事親
從兄之日親師取友之餘養之有素今值春官造士天
下需才正當奪發有爲勉抒夙抱然而悠悠我里何日
忘之攜此一圖置之行囊使山光水色都入澄懷馬足
車塵頓銷俗累他日名成志就拂袖歸來青瑯之風景
依然山居之主人如故庶不致麋鹿避客猿鶴笑人則
是圖未必非用世之券也余嘗題其卷末云俯衣莫相

負留誓故山前是則荻舟繪圖之意而余之屬望於荻舟者正未有艾也

蠅說

黃子齋居見螻子潛伏牕櫺間若無意於求食者俄而羣蠅飛鳴自得相距稍遠螻子見之略不爲動偶過其前一撥卽得十無一脫者黃子曰噫人爲萬物之靈麟鳳龜龍又爲物之靈者推之至於蜎飛蠕動之屬蠢然無知而造物者莫不各予以求食之方卽予以避害之具夫螻子蠅虎之屬以蠅爲食者也故予蠅以翼可以避螻子蠅虎之害又可以求殘羹冷炙之餘瀝以爲食

其所以予蠅者不已周乎然蠅雖有翼卒不能避螭子
蠅虎之害者何也蓋以有翼則喜動動則見利必趨見
害卽倉皇失措而螭子蠅虎靜以待之於其飛鳴自得
時察之已久故偶過其前無或脫也然則人之靈何止
百倍於蠅而人之多才能者又何止百倍於衆人方其
逞才傲物時自以爲世莫余敵可以肆行無忌又安知
几席牖牖間不有靜以待動如螭子蠅虎者得以潛制
其命哉是可畏也已

三長物齋文略卷四

寧鄉黃本驥仲良著

書經節略跋

書在漢代今文古文原自別行各有專門授受之學自後儒合爲一編遂致真僞淆雜學者祖分左右聚訟紛然矣自元至今如吳氏澄梅氏鶯閻氏若璩皆有辨駁古文之書其說至爲精核而陳氏第乃力攻梅說作尙書疏衍毛氏奇齡亦力攻閻說作古文冤辭皆篤信古文巧相詆詰反以今文爲僞是盡賞其華而棄其實重皮毛而輕骨髓者也謂爲善讀書者可乎蔣春巖先生

服政之暇取今文而節解之復取古文而比較之知古文之華而後知今文之實知古文之爲毛皮而後知今文之爲骨髓也護篆五筆始付剗剗爲手校一過釋其所論既不阿附草廬諸家亦不屑與西河等斷斷致辨第就今文之簡奧以證古文之繁蕪就今文之精密以證古文之粗疎以經解經要歸於有用之學是書旣出不獨可爲濟南功臣其亦可爲尙書定本也夫

觀潮圖跋

海寧觀潮之勝甲於瀕海諸郡縣錢塘之潮由鼃子門入奔騰衝擊聲撼地軸固已極觀海之盛矣海寧西南

三、是勿爾之各

三才圖會卷之四
以命筆之由則曰此余客海寧時舊藁也出藁見示且
屬一言以題其端余謂天下勝境夥矣以余所見洞庭
之月太華之雲終南之雪皆極寰宇之大觀安得有妙
筆如翁者一一圖之張諸齋壁豈非卧游之勝具哉因
爲詳攷海寧潮勢之所以盛於錢塘而甲於瀕海諸郡
縣者跋於卷末以應雅屬云

講藝圖跋

魚麗鵠鵠之制見於鄭荆尸二廣之制見於楚而陣名
以著鄭人之爲魚麗也曰先偏後伍伍承彌縫楚人之
爲二廣也曰廣有一卒卒偏之兩且薦敖之泊楚兵也

曰右轅左追尋前茅慮無中權後勁魏舒之治晉兵也
曰專爲右角參爲左角偏爲前拒王孫雄之治吳兵也
曰百人爲徹行萬人爲行陳而陣法以傳然皆用於臨
敵對壘時而非平日訓練之法自孫吳穰苴以不如唐
李靖宋曾公亮明唐順之戚繼光諸家所著兵事之書
不下數千百言類皆奇正迭用主客分形攻守異宜險
易殊致而訓練之法於是大備然其立說亦有宜於古
而不宜於今者宜於彼而不宜於此者至於陣法名目
如流星偃月飛鶚長虹非不碁布繩牽各有條理及當
場校藝授之不得其方守之不通其變往往臨事而廢

遂視古法爲具文此兩峯將軍講藝圖之所由作也圖中所列梅花疊陣之法出於楊誠村軍門呈進之本而將軍復演爲五星分布之法鉤聯蟠屈變幻無端爲自來談兵者所未及驥鯨生也不知兵然於左氏傳司馬法及握奇虎鈴等經亦嘗瀏覽及之而知古人用兵如所謂四奇四正而爲入陣者諸葛武侯嘗行之於蜀矣然其法不自武侯始也竇憲曾勒入陣以擊匈奴矣亦不自武侯止也馬隆皆用入陣以復涼州矣皆能取勝於一時而武侯鞠躬盡瘁僅足以服南方巴獫之酋其於三曹三馬之梟敵究不能建尺寸功豈陣法之不精

而運用之未善哉盡時與地有以分其心而擊其肘也
今日者

皇威遠振海宇一家軍門之圖既已進

御頒行而將軍復爲推闡以極其變用之苗疆固可以
成武侯之偉績行之天下亦可以建寶馬之殊勳且前
明之討倭寇也屢調永順鉤連槍手矣彼以區區土司
之兵尙足以備征戍而衛海疆況將軍坐鎮五箴練兵
百隊一旦虎符飛調有不與魚麗鵠鵠荆尸二廣並傳
而爲薦敖魏舒王孫雄所望而却步者哉茲客沱江承
以圖說見示用敢敬摠管見以志服膺而誠村軍門與

驥亦有一日之好并乞寓書就正當亦爲儒生紙上之談發一大噱也

移居圖跋

右移居圖一卷宋景定間雪川進士錢選舜舉作主人豐頤微髭類有道者騎蹇驢一僮執策左牽之前有少婦擁二稚子坐犢背一僮負琴囊一媪抱畫軸以二犬一羊爲導最後有老僕肩帷幕蹒跚行家具不多男婦老幼皆有翛然自得之意卷端有家石齋先生移居圖三字甚可寶也今爲鄭雪堂得之雪堂家五筭嘉慶元年燬於苗以官爲家而余固無家者也安得起圖中人

問之居於何地移將焉往桃源雞犬栗里桑麻尙有隙地許外間人卜鄰否石齋先生爲前代名臣當啟禎朝國家多難慷慨身殉漳浦舊宅未嘗一日安居濡筆書此其亦有欣然嚮往之志耶余爲其族屬擊斷古劒無家可歸流覽手蹟不勝門戶盛衰之感此中情緒又非雪堂所能共喻也

陶山文錄跋

不之關中不知古都會之大自京兆馮翊以至天水隴西南有巴蜀西有張掖酒泉又西南有牂牁越嶲之域咸屬焉背山帶河九州膏沃陶山先生以吾鄉耆宿開

藩於此疏鄭白之渠闢嶠函之塞未及期年民物殷阜
敷政之餘復取鄠杜竹林南山檀栢昔所號稱陸海者
納之胸中攄之腕下故其文之浩瀚從隆直與洪河
涇渭終南太華之山川相埒驥以故人子春官報罷策
蹇西行謁先生於古南柯室授餐寄榻數月於茲出所
簪陶山文錄命爲校讎讀其文之宏博巨麗如身入建
章千門洞闢殊形詭制不可殫論其淵懿則灋灋之洞
漩也其險奧則褒隴之阻阨也其立論之和平敘事之
典則長篇短幅皆有切於日用有關於經術則沃野千
里而源泉灌注提封萬井而桑麻鋪荼也其中爲驥所

乞請之文凡二一爲先君子墓表一爲近輯隋唐石刻
拾遺序驥何幸得游關中周覽夫金城萬雉天地陬區
而又得讀先生之文以釋其抑塞磊落無聊不平之氣
且得拜求鴻筆榮及先人摻採殘碑挂名簡末他日與
湘中故舊談及秦游之勝竝可舉以相詫也

讀十六國春秋隨筆跋

讀十六國春秋隨筆一卷諸城王香杜夫子撰夫子以
承明著作之才小試龍標服政之暇輒以文史自娛甲
申春以公事詣省門途次取十六國春秋隨讀隨記前
序後詩附以雜擬之作凡如干首命驥校付剞劂彙

三才集卷之四
魏崔鴻是書自崇文總目已不著錄今本百卷爲明屠
喬孫項琳等僞作其所敘述已非當時實錄而好奇嗜
古之士猶得於鴻書散佚之餘尋撫十有六國八十餘
年善惡興廢之蹟亦由屠項搜輯之功與他僞書異也
南城曾賓谷先生陳臬湖湘時曾有十六國小樂府之
作刊賓雨茅屋集中夫子是編文仿六朝詩取唐律與
賓谷先生異曲同工而論斷之精取裁之富更可補屠
項之所未備而爲好奇嗜古之士所目駭而心折也自
來論文者推劉彥和文心雕龍論史者推劉子元史通
夫子舊史官也以雕龍之筆論史殆合二劉之才爲一

手其師史通所謂三長兼擅者歟校訖書此以志服膺

跋鄧鹿岩輓一念和尚詩蹟

鹿岩名祥麟字子與武岡人詩作於康熙

年十

嘉慶己卯與修省志一日偕共事者游嶽麓寺於方丈
案頭見有朱筆批注妙法蓮華經廿冊書用王逸少法
絕工問之寺僧云此康熙間阿諾和尚手蹟也因摘其
自序爲撰傳入方外志而以經目編入藝文志阿諾之
名由是遂顯湘舉學博得其宗人鹿岩片紙於夫葵僧
舍力爲表揚而鹿岩及所輓之一念和尚遂因湘舉而
傳一念阿諾皆世外逃名之士其傳不傳無足輕重百

餘年後尙有見其手蹟輓詩愛護而傳之如余與湘泉者則士君子閉戶著書特患不工毋患不傳而急急於鏤板行世者何爲哉然工詩能書其人品又爲勝國遺民如鹿岩其人者宜若可傳矣乃百五十餘年後問之鄉人已不能舉其姓名使非荒庵片紙流落人間又得有心人如湘皋者爲之表揚而欲其名之傳也蓋亦難矣然則士君子著書雖工安能保其不散則鏤板行世亦有不能不急急自謀者噫可慨也

題劉紫峰小照

小雪後一日倚老母坐斗室中間剝啄聲呼僮奴有

客闖然直入時薄暮矣辨其聲則廬溪劉紫峰也以便服見老母拜者再老母索杖欲起紫峰以手按母膝曰奉珍與虎癡交如兄弟虎癡母卽吾母也老母不得已坐受拜因詢其所自曰自都門歸泊舟長沙哭蔣春巖觀察於蕭寺詰旦將解纜故夕而謁也旣而謂余曰十年前與君同客永綏時春巖觀察丞其地去歲一晤於辰郡再晤於五筭皆主觀察治所觀察君之知己亦吾之受業師也今以王事歿於旅次君得經紀其喪吾春官報罷僕僕道塗負吾師矣負吾師矣袖中出小照屬爲走筆一題余視其畫筆不甚工貌亦不甚肖問其作

照之意曰無深意也問其作照之名曰無定名也余笑
曰不工不肖照奚爲存無意無名照奚爲作紫峰蹙然
久之曰今之作照者多矣大抵身都顯仕擁厚資藉托
綺麗之情故託蕭閒之狀登奇峰者不必志在山也臨
清流者不必志在水也橫紙上之琴而管弦正沸坐圖
中之月而車馬方喧照雖工亦奚取哉吾則潛塵滿而
落拓言歸鐵冷一官菟裘是卜貌固不必肖畫亦何必
工君獨不可以無意遇之而以無名名之乎且吾與鄉
人及異鄉人交者亦夥矣求其不濫不渝始終若一者
吳君若也故以此照索題非謂櫝重於珠而以貌似爲

可貴也余復之曰君之照不必貌似題君之照者又可
以形迹求乎君之哭春巖觀察也足以見師生之誼拜
吾母如已母也足以見朋友之情叔山無趾有尊足者
存又何必遊於形骸之內而索乎形骸之外徒爲申屠
嘉所竊笑哉紫峰曰善卽是以題而歸之旨道光丙戌
歲也

題李閨甫團扇

余與李君閨甫訂交三年矣常用韓昌黎此日足可惜
韻作詩以贈閨甫珍之爲書於箴茲復出素紈團扇陽
面爲香伯邵君山水屬余爲題其陰余謂團扇詩自班

僊仔後絕少繼作宮壺怨辭非吾輩投贈語也因誦僊
仔詩有皎潔如霜雪句謂閨甫曰請爲君談霜雪之勝
余生長湖湘聞行客以風霜爲念徒知朔風之厲而不
知霜甚於風辛巳季冬道過鄭州古燕南趙北地也有
積水周數十里澄碧可鑑中亘長隄跨以連橋十二兩
岸多髡柳野鷺游魚飛躍相狎若家畜然顧而樂之恨
不移家住此是日東方初白車行隄上寒氣襲襟袂慄
慄不可當忽見柳際如堆木棉枝幹盡封水面蘆葦
慘然若冰玉人之鬢眉馬之鬣熾頃刻都白始知北方
之霜甚於南雪壬午客關中開詩社於慈恩塢院重九

前一夕枕上聞折竹聲響振窗紙晨起闢戶始知雪深
徑尺披裘上馬馬蹄踐泥土與冰雪相雜瓊瑤滿地溽
滑不能疾馳遙望終南山縣亘數千里混茫一白遠與
天際樊川杜曲諸勝蹟莫不傅粉凝脂獻態馬首及至
墻下埽敗葉與儕偶雜烘談及吾鄉重九未有若是寒
甚者自後每值酷暑迴思車霜馬雪毛髮爲豎然當是
時停鞭覓句若忘其寒蓋境勝而心有所寄故霜雪不
足以撓之也吾輩置身於炎涼毀譽之交大抵心有之
則一刻難受心無之則終身可安何往而非霜雪獨秋
風團扇爲區區弱女子作不平鳴乎閨甫試於熱極用

扇時以余所談霜雪之狀而尋香伯畫境當亦暑褪寒生神往於趙北終南之勝矣

燕泉集書後

郴州何文簡公孟春著作見於行述者有擬古樂府陶靖節集賈誼新書易疑初筮十二卷五經晰疑萬花谷河圖洛書解孔子家語注八卷撫瀋條約十卷軍中耳學二十卷平夷錄四卷餘冬敘錄六十五卷閒日分義百卷備荒恤刑書批點李太白集燕泉雜集十二卷燕泉奏議十冊燕泉舊藥十冊見於燕泉集者有論衡鈞石羣芳續鈔見於八世孫泰吉跋者有李文正樂府註

見於盧紹弓家語序者有孔子集語大戴禮註合之得
二十三種驥備硯來柳邇求遺集僅得燕泉集餘冬敘
錄家語註文正樂府註四種板藏何氏家祠餘書十九
種詢之鄉先生無復知者豈皆汨沒於兵燹之後耶抑
子孫不克家無能珍其手澤者耶驥竊有慨焉矣公立
朝侃侃不避誅夷卽議禮一端固已彪炳史冊後世之
高山仰止景行行止者原不在區區文字之存與否然
公歿於嘉靖丙申去今纔二百七十年其著作之存僅
十之一二再一二百年後又不知此四種者之能長存
與否是可慨也何世之不能遠觀者或達於朝或窮於

野不思立德立功垂令名於不朽惟斤斤焉逞其臆說
各著一家言以爲千百年後盜名計噫亦愚矣哉

書鄧湘皋學博臨川李公生祖母戴太夫人墓誌

後

爲父後者爲生祖母持服禮無明文惟喪服小記云爲
慈母後者爲庶母可也爲祖庶母可也所謂祖庶母者
謂祖妾有子而子死父命已妾之子爲之後服齊衰三
年與慈母及後庶母者同也非指父所生庶母而言爲
父所生庶母服齊衰不杖期始於宋開寶禮而朱子家
禮亦有庶子之子爲父之母服一條卽指此也明集禮

明會典皆無其文至

大清會典始復宋制

大清通禮因之次孫爲祖庶母服議見於杜氏通典者
有晉王廙宋庾蔚之之說見於魏書禮志者有張普惠
之議見於宋史禮志者有王洙之狀見於文集雜著者
有王廷相荅左衛夫書姚翼家規通俗編柴紹炳庶孫
不爲生祖母承重說剖析羣言殆無遺議其大旨皆謂
庶孫無重可承斷不得以鞠育私恩制爲匹嫡之服故
明南京車駕主事臧應奎以祖庶母喪求去格於例猶
執私喪三年識者臆之臨川侍郎李公以嫡子之子爲

生祖母後於嘉慶二十一年丙子奏請在籍終養至道光元年辛巳禮臣議改生祖母服爲斬衰三年越二年癸未而中丞之養終遂遵

制成服

朝廷若爲侍郎破古今成例而特遂其烏烏之願者明年甲申禮臣覺前議過重仍奏請改從期服中丞三年之喪雖未終而其報本之心則已達矣豈非孝思純篤有以感人心而膺

天眷哉侍郎嘗任湖南學政與本驥有師弟之誼今歸道山已逾年因讀湘皋學博所撰戴太夫人墓誌爲申

其說如此或謂服已奉改學博此文可以不存本驥謂
學博之文作於未經改定之前其時侍郎赴告且及天
下銘幽之石早已深埋存此文正足以傳信於後且以
見服制升降之原悉本於我

朝孝治之精意云爾

賢母頌

孟母斷機

巖巖孟子道嗣尼山厥母仇氏教以義方買肉示信斷
機立閑機斷可續學廢難寬卒以王道顯齊梁間

陶母截髮

有晉賢媛惟陶湛氏截髮延賓以成令子母髮則截母
心則喜運號勤劬翼匡王室截髮初心如是如是

柳母和丸

河東柳氏教子維嚴屑熊爲粉和以參連誰謂丸苦不
如飴甘甘者易敗惟苦乃堅母道師道韓夫人肩

歐母畫荻

歐九幼貧家徒四壁母教之書代筆以荻荻無毫穎畫
灰歷歷中書管城遜此勞績學書不成貽阿母戚

愛蘭贊

淵明愛菊茂叔愛蓮蘭有國香愛者闕焉或曰孔子猗

蘭有操辱愛尼山蓋供衆好

二難硯銘

余蓄端石二方製作各殊大小相等共爲一匣名曰二難

伯虛其中惟虛能容

伯難

仲厚於外惟厚能載

仲難

粉定印色盒銘

其外白其中赤印以心毋印以石

木鐘銘

道光壬寅監製縣學樂器仿古編鐘作木鐘爲銅工式事後棄之可惜作架縣於座

右銘其肩以博觀者一笑

無聲之樂不金而鏞善用之爲振木鐸不善用之爲撞

木鐘

張竹泉刺史傳

前澧州刺史張公諱範竹泉其號河南尉氏人也三世
官湖南祖退庵終善化知縣父艾甫宰芷江時生公乾
隆庚申遷靖州判嘉慶庚申公復署靖州牧有感舊詩
紀其事公弱冠舉于鄉大挑一等分發湖南補鄱縣知
縣歷署武岡芷江等州縣乾隆五十九年遷澧州牧嘉
慶元年川楚教匪跳梁澧屬之石門慈利永定與荆施
接壤公團勇設卡水陸周防復指授各邑令一律籌備
永定十四都熊英才師事川匪楊謹隴傳經呪於熊尙
信等都民被惑者二百餘戶又令熊學德斂貲赴川約

於是年三月十日起事山澧趨荆互相接應匪黨熊希勝遣向奎元等買製旗幟縣令張光考獲之廉得其實稟請勦捕此二月二十九日事也公曰持之太急是激變也稍遼緩之又恐有滋蔓難圖之勢不如及其未發而遽除之猶可以弭患適永定孝廉樊生松等在州公草檄起其歸諭居民隨將堵禦事宜分任盧嶠馮舟二尉而與安鄉尹蕭光詠星馳抵永集吏民講守禦法其附郭民間公至頓釋疑懼惟十四都距城且七十里猶人人搖動都西有檳榔界路通來鳳最爲險要公令鄉勇守之以防竄逸又募有膽力者入都分諭聚集團練

並示從匪人等有能自悔幫擒首惡者免尋有累萬占
等數十人自首公卽用爲眼目指授方略熊尙信等十
四犯以次就獲其時入都之王開義等師事恩施匪王
維且將與熊尙信合謀亦就擒公分別首從上其罪狀
於大吏正法者九擬配者五餘俱減等省釋縣民安堵
如初時承綏苗變故爵部堂福公奉

命南征豐當孔道羽書旁午飛挽馳驟最爲繁劇公擘
畫經理悉中機宜大吏方倚爲左右手旋以母憂解任
服闋署靖州牧又借署恭陵攸縣武陵等州縣十二年
仍補豐州明年告病歸里繪松菊三徑圖以自況公廬

體豐厚多鬢髯善飲啖能爲大癡山水居官多惠政所
在有聲卒年六十有七

柳江先生小傳

羅柳江先生耒陽人乾隆戊申名解元也性恬淡能文
章六上公車不第髮鬻鬻白矣就永綏廳學官永綏人
士知嚮學自先生始先是永綏城在苗砦中嘉慶二年
移治花園堡就民屋爲學署做漏如破甕不可以蔽風
雨先生力爲新之集諸生講學其中月有課季有考挾
冊而來者不拒也郡縣學官例有正有副有門子以供
指使有學田以給饔飧學使者三年兩考入文武生或

四五十人或二三十人學官視貧富而收其贄饋終歲之用常有贏餘焉惟乾鳳永三聽正副以一人兼之雇一二蒼頭以供指使歲收屯穀百石以給饗殮學使者三年一考入文武生十二人苗生四人類皆貧者而永綏尤甚屋角炊煙往往無風自斷而先生處之晏如也先生子若孫指以百計者四男女皆有執業奉所配某孺人居於家惟攜一妾兩孫隨侍笥中舊繡非朔望不加於身出常以步市人擠肩而過不知爲學官也其性之恬淡大都類此驥七歲時就塾師問字有市先生元文者師取而誦之曰此古文家也近十餘科無此作矣

當是時驥一童子耳不知古文爲何物然師之所言謹志之不敢忘弱冠後衣食奔走於衡邵郴澧間所至之處類皆有學官而學官類皆岸然道貌齒德俱尊後生恒畏見之學官亦自負其尊恒不樂與後生接見故學官之門草嘗徑尺惟鄧南坡尹雨麓諸先生幸以文字爲忘年交去歲至辰陽又交譚曉園先生終以不得至永綏一訪先生講求所謂古文者爲恨今幸至永綏矣先生一見如舊相識若自忘其齒德之尊出生平所爲文使讀之驥以童子時之所聞一旦而償於二十七年之後不可謂非厚幸也第見先生繩牀茗椀硜硜說經

而吾師之誦先生文者已違侍十年不可復見則又愀然悲矣

贊曰未水出桂陽經縣治前東流而會於湘驥嘗掉扁舟往來其間煙水蒼茫望杜陵祠墓不可卽低徊久之意其中必有高年碩學可與弔古爲一鄉文獻之徵者所謂伊人在水一方今乃於斯地遇之欲訂後游驥非其侶自喜又自愧也

書某氏婦事

婦人所重者節耳吾鄉某氏婦孀而嫁嫁而死節不終君子無取也然其往事有烈烈丈夫所難爲者前夫故

貧士婦之父官冀州夫挈婦所生子往依之父子相繼
死於冀婦聞耗偕小叔往迎喪走長江取道金陵時有
官其地者強止之遣其叔去冀迫喪還而叔又死婦瘞
叔於金陵而負夫與子之骨歸里其歸也無舟貧婦曰
是不可以柩返出其父子屍以大油布裹長短袂作行
季狀子身至江干問舟舟子見一婦人而將二袂廉其
直附以歸婦至舟以夫置卧具之左而枕其子以卧時
值酷暑熏烝屍氣達於袂外婦焚旃檀亂之且祝曰若
幸自斂不爾舟人不我載父子終爲羈鬼矣闕四十日
經三千里舟中人莫知也將至里換小舟婦自念曰數

千里扶喪而以祔歸爲鄉里笑非死者志吐其實傾橐
中數鋌付舟子爲市大小二棺就舟中解其祔屍腐筋
斷骨有易次者手正之載以歸里里中人莫知也時婦
年未三十此其生前自述者吾爲書其事所以壯天下
之婦行哀之也闕其名所以勵天下之婦節惜之也

三長物齋文略卷五

寧鄉黃本驥仲良著

致李松甫太翁書

松甫太夫子閣下驥自爲童子時於陶季壽姻丈處得讀韋廬鈔藁其時雖不知詩然已心識其境之超味之澹非近人集中所有及春溯夫子視學湘中得以弟子員雜試於席棚鋪舍間擢置優等錄入門牆竊冀安輿就養時或能攀帷一謁少慰夙昔之思及集讀浮湘驥以授徒外出此願遂不及償然韋廬詩初集二集經夫子手授者藏之行篋未嘗一日廢也此後以遠方後學

不敢輒以所業文字妄自郵致故私淑雖殷而尺素未
達者近二十年矣昨歲家弟本齡自粵歸蒙以續刊各
集見賜尤覺般倅之門不遺寸朽本年夏秋間又於家
雲滌季父手諭中屢致諄念竝有議修見招之說竊念
驥一介寒士伏處湘中行年四十有六而名譽無成然
乃自少至長所至輒爲大人長者辱收弊進旣榮之以
人倫之鑒又任之以翰墨之責如曾賓谷翁鳳西唐陶
山諸先生旣得見而師事之矣若太夫子則猶未及一
見也不識何人謬爲陳說得使疲驥之名亦入孫陽之
耳此則驥之目幸且慚而不能自解者耳驥少與先兄

本騏同事筆硯同鄉文字之好季壽姻丈雲濤龔君外
不過數人先兄中年下世所遺有三十六灣草廬詩草
十卷詞草一卷爲生平心血所在頗有直到古人處暫
以力薄不及刊行季壽木拱雲濤草宿皆遺著無聞恐
就湮沒不知惜才傷逝之餘尙有所收輯否驥壬午秋
客關中爲陶山先生編訂文集本年客五簞爲蔣春巖
觀察校刊書禮春秋各經自信校讐參訂頗有微長至
詩古文辭雖性所篤好而存者甚尠近編三長物齋詩
文藁各二冊敝帚之享僅此而已力旣不能付刊又復
懶於錄副故無以爲就正之資惟凝學八卷及先兄所

著賢母錄四卷現已付刊俟刊竣卽寄呈也前得季父
家諭時方就春巖觀察之館賓主三年情逾骨肉雖欲
赴粵應招而去舊趨新誼有不可忍今七月初觀察棄
世經紀喪事後趨謁之緣似將可遂顧念家慈老病日
增門閭望切家然代養之丁勢難絕裾以出請謁緣慳
彌深悵惘夫以不能一日安處之身而值萬難外出之
境辱荷遠招徒呼負負故敢敬陳下悃伏乞鑒原俟家
慈稍健可以遠行不必寄致關聘亦不必拘議修金湘
灘伊邇定當荷笈登庭有可稍效心力者無不勉竭微
長藉副詢注而已人下里亦得以效韋高唱執策自過

或不終於驚鈍至聆緒論而接風采得以償童年仰慕之願猶其餘幸也謹具寸箋恭候頤履康和冒瀆之愆竝乞宥鑒本驥頓首

代城南書院肄業生壽羅湘舟先生八十序

太史公之傳儒林也曰伏生年九十餘爲尙書師弟子爲博士者十餘人申公年八十餘爲魯詩師弟子自遠方至者千餘人轅固生年九十餘爲齊詩師諸齊人以詩顯者皆其弟子也漢人重經學而史敘經師必兼敘其年齒非年齒之高果足爲經師重也惟經術湛深而後能精神彊固此非弟子所能期必於師而師固有可

以自必者吾師湘舟先生以石渠舊史歸老林泉屢主
衡邵諸郡講席其在城南又且六年矣執經之士一經
指授類多售於有司卽或不售亦不失爲閭里修士雖
不知視伏生申轅諸家弟子其所得於師者爲何如以
視漢之師法厯厯以訓故立門戶者則旣過之矣抑又
聞之伏生被召老不能行而先生則齒牙步履方強健
如五十許人他日

熙朝命使以安車蒲輪修漢代迎師故事吾知其老而
益壯鏗鏘說經固不減於申轅諸氏卽濟南遺老亦豈
能以壁間數十策相傲耶或者曰衡山壽嶽也而先生

適生其地宜其以地之靈而爲人之瑞也執是說則先生之壽爲山川靈淑所特鍾一若攷工制器有遷地弗能爲良者然使山川而能增人壽數則彼衡山樵牧非不日往來于祝融紫蓋間其或壽或否要無定數就令餐赤芝而飲醽醁齊年王喬比算羨門亦不過爲巖穴間養生常術其於壽身壽世之道兩無所得要若古之經師湛深彊固有所以自壽者地固不足以損益而輕重之也今夏四月爲先生八表誕辰生等近在門牆治經之學平日所聞於先生者甚悉而先生又儒林中人也故敢以太史公之敘經師者敬侑一觴至於門第

三才圖會卷之三
之美科名之盛鳳毛麟角子若孫之濟美一堂銀屏十二朱履三千鏤瓊瑤而揮珠玉則有眾賓之說在

鄧湘皋學博六十壽序

人必有真性情而後有真學問性情者學問之根柢也
不根柢之務而惟枝葉是求雖窮年矻矻著書等身亦
如紙卉瓶華非不鮮艷奪目求其久榮而暫馥焉不可
得矣今於吾縣學博湘皋先生有以見其性情學問無
一不真其著作之宏富文字之瑰奇皆從偷常交際醇
篤惓款中流露而出又有不屈不撓之精神以貫注於
其中可以壽身卽可以壽世非苟以炳煊自炫而與悠

悠者爭一時之聲譽也先生自少至壯北遊燕東至齊
魯又東至吳而南極於粵其於山水友朋之樂足以抒
寫性靈者亦既納之胷中攄之腕底矣而一時名公卿
及海內知名之士無不傾蓋倒屣求識願鄰共知有湘
皋其人者然名益重知者益衆而其學問之根柢於性
情究不能人人共知驥與先生未見而傾慕者十年既
交而欵洽者又十年矣自先生倦遊歸里屈就玉潭司
鐸地距會城僅百里程因事而敘晤者歲且數至至嘗
主余家或數月未見則緘素往來無虛日也哲昆雲渠
先生驚於友愛嘗取眉山對牀之意以聽兩名山房且

爲圖以促其歸隱而先生亦爲南村耦耕圖以報之式
好怕怕出於天性其淑配某孺人化之樂與姒氏同居
未嘗一至官舍其子若姪亦蒸蒸然化之講藝趨庭讐
書共案若不知子有常父其性情之見於倫常者如此
湘潭張君蓉裳爲其縣教諭先生生刊其詩卒銘其墓
凡所以顓恤其孥者甚至其於同輩及後進之士一日
之好一藝之長無不津津樂道惟恐其學之不成而名
之不著其性情之見於交際者如此先生喜以著述自
任於昔人垂絕之編不朽之烈尤引爲己責而不辭嘗
刻湘潭周伯孔楚寶而補其遺編晉江蔡司李遺集而

表其節又摻輯安化益陽新化寧鄉四縣人古近體詩
數千百首而定爲濱江耆舊集今古文人血脈流貫其
性情之息息相通不懈不倦者又如此夫然後知先生
之學問根柢於性情而其精神疆固年雖周甲邁往精
進之氣不減少時則又從學問中涵養而成皆非世俗
之能文章而享耆壽者所能同年語也抑驥重有感焉
先兄花耘與先生生同歲而驥之不克肩隨者已逾十
年今見先生如見吾兄而見先生之事雲渠先生益令
人增脊令之慕曾題聽雨圖句云加飯妬君情兩重正
謂此也今歲仲冬爲先生六旬攬揆鄉人士屬爲一言

三
稱慶其於先生司鐸七載教澤之深鄉人士類能言之
皆略而勿道特於其性情學問之真有非他人所能共
知者敬侑一觴先生默然聽之當不以爲諛我

闕雲山八十壽序

壽爲五福之一載籍所傳惟畫家之壽者最多唐宋以
前無論已元明諸家如倪黃文沈皆年逾八十說者謂
烟雲供養宜其坐享遐齡是福之最清者也余則謂畫
家凝神一志如道流之調息釋氏之結趺終日據案不
爲外物所擾得仁者之靜靜故能壽又其畫多仙禽古
木瑞獸祥芝筆墨所至精誠貫之故其得壽有必然者

今見雙山先生年屆八旬精神強固步履飲啖勝於少年益信余言之不謬矣先生世居樅陽挾藝外出所歷多名山勝水所接多高人逸士流寓湖湘近四十年每出一畫名公鉅卿爭購藏之以爲重寶得意之作往往持以贈人心所弗善易以重金不顧也而其畫筆以丹青工細爲務禽獸之羽毛草木之華葉人物之風神態度無不求工於楮墨之外徑尺之絹累日始成踵門來請者未敢以能事相促故其所作能自信必傳要其用心緻密精力充盈亦卽眉壽無害之實徵也而其爲人存心古道久要不忘所與交者皆服其誠樸性喜客每

宴客治饌必精不使一面生者相雜故尊酒不空坐上常滿平生鬻畫之資緣手立盡嘗預製僧服爲仙蛻計家有賢偶且有子若孫若惟恐其以家事相累未嘗一動歸皖之思然則余所謂不爲外物擾者在先生則不僅於畫見也或曰先生壽益高窮益甚得無擇術之未善乎余曰不然造物者欲使人成一藝之名必予以三具凡藝皆然於畫爲甚三具維何曰壽曰健而窮其一也不壽則畫之傳於後世者不能多而其名可暫而不可久不健則不能畫不窮則美食鮮衣求田問舍皇皇然爲子孫計雖雅人不免爲俗累而不暇致力於畫天

之所以使先生老而彌健竊且益堅者未必非玉成其名以視世之庸庸而富厚者孰得孰失先生當有以自擇矣今歲仲春上旬五日爲先生八表誕辰人皆羨其得於天者獨全余故約舉畫家之年逾八十者以爲侑觴之獻知先生之壽因畫而致且卜其爲

熙朝人瑞百年未足爲多必能超出於元明諸家之上也是爲序

代鎮筵鎮告風神文

維年月日具官某致告於風神曰風之薰兮解愠不愠之解而徒薰神不若是之忍也風之時兮阜財不財之

阜而違時神其何以示閔也將吏不職罰所自來也邊
民何辜罹此災也稻之早者未秀而其晚者猶未茂也
況彼山田易滲漏也十日一雨尙恐澤之未透今已兼
旬苗將槁而莫救也非神之佑而誰佑也雲溶溶而欲
布孰爲割之雷隱隱其將鳴孰爲遏之雨翳翳其待施
孰爲奪之咎無所歸惟神之尤兮功不可貪惟神之求
兮神其召屏翳敕豐隆迴羲馭而反此風也約以三日
神之功也三日不雨神聽之不聰也爲民請命將吏之
責也牲醴既具禱祀維虔不職之罰其或可以少釋也
尙饗

代謝風神文

維年月日某官致謝於風神曰時惟仲夏南風大作雨
澤愆期軍民焦灼設壇致禱陳辭畧畧自辰至酉風勢
愈惡方謂失職非神之虐俄而反風涼氣入幕雨隨風
至霑濡優渥遍及田疇漸入城郭竟夕連朝傾盆注壑
孰比其甘醴醕乳酪合境民苗皆大歡樂惟神之靈洞
察民瘼如慈父母有求必諾得此時霖可占秋穫敬陳
牲醴藉申虔恪匪曰報功聊紓愧怍雨沛雲油雷轟電
爍凡百神祇同享此爵尙饗

道光丙戌五月余客鎮筵時值亢旱嘉禾待槁呼籲

莫及陳雨峯鎮軍階平以函致余曰吾鄉某前輩忘
其姓名老名士也生平不詣官府歲值大旱忽詣巡
撫轅求見巡撫倒屣迎之旣見問何事枉顧某曰方
今雨澤不降南風阻之也祈雨無益袖中出祭風文
稿曰別設一壇虔誠致禱霖霽可必得也巡撫從之
果得大雨今先生來鎮見弟等匍匐郊壇三禱無驗
忍坐視乎敬求大筆撰文一如吾鄉故事余復之曰
地方官誠求如此無不立應驥非某先生比也承命
撰文向不敢卻因擬草付之鎮軍遂設壇致祭是日
自辰至午南風更烈及至酉末忽轉北風陰雲四集

大雨如注連宵達旦三日始止禾遂大熟鎮軍因創
建風神廟於城南大會賓客以落其成并刊石記之
越十年乙未客吳荷屋中丞榮光幕中語及此事中
丞索觀是文歎曰丙戌之雨實此文致之也又十年
己巳季夏偶檢舊稿附識於後

祭汪容川司馬文

維嘉慶壬申三月日長沙黃本驥客衡陽聞誥授奉政
大夫寶慶府同知前翰林院庶吉士汪容川先生訃欲
往哭之牽於事不果驥聞百里羈者致以故乃爲文以
寓其仲君籛樵昆仲代告於其靈曰嗚呼先生死矣先

生之年七十有四於禮得稱老先生之子若孫入龍三鳳萃於一門先生雖死先生復何憾先生之科名則由選拔而詞林也先生之宦蹟則由粵而楚由校官而縣令而司馬也先生之政治則舉卓異者再上游之特識僚屬之公評士庶人之口碑具在也先生之文章學問則有獲經堂全集祥刑經解周易衷翼集解諸著作傳之無窮也先生雖死先生復何憾然驥聞先生之死爲位而哭若有不能無憾於天之所以死先生與先生之所以死者而先生則竟死矣嗚呼尙忍言哉尙忍言哉驥以乙丑冬由前長沙太守沈筠堂先生達姓名於門

下辱愛最久知先生最詳而先生志之未竟者約有三
焉先生之令於粵也歷任新會順德博羅石城等縣疊
視繁區家無儋石恬如也案牘之下惟以治盜爲急務
瀕海汊港添設哨船又於四鄉行保甲法民賴以安嘗
著捕盜議上於長官惜未能次第舉行終先生之身未
嘗一日去諸口此其未竟者一先生之丞於楚也階雖
遷而事則簡矣因得以其間治經學居恒手一卷丹黃
不輟如諸生習舉子業聞考官將至窮日夜之力猶恐
不足者其書半已鏤板尙有春秋比義數十卷稿凡數
易垂成而廢此其未竟者二先生長君豫林讀書發憤

人也西河文學固多傳人而其望長君尤切長君亦善承厥志京兆再試違養三年誓欲得一領宮袍以博老人歡笑無如席帽未離竟於去春客死自聞訃至今家人未敢遽告而今乃白髮斑衣泉臺相見其悲慘更當何如此其未竟者三夫先生治盜之法後之官海疆者或可代爲舉行一二遺經亦可俟子舍諸賢補刊行世卽長君早逝而遺孤稍長夫必相以有成然則先生之志雖未竟於生前尙可卜諸異日而驥之所不能無憾於天之所以死先生與先生之所以死者則更有在驥與先生非有故舊鄉戚之好也非有財帛酒食饋遺之

私也而先生之視驥也不啻家人父子驥生平於當事
中稱知己者三人一爲筠堂先生一爲前澧州刺史張
竹泉先生其一卽先生也筠堂先生左遷太原相距數
千里無由日炙光儀竹泉先生退老梁園已於前歲騎
箕尾去矣所恃以導善而糾過者惟先生一人今一旦
而先生又死遙望靈輦悲橫胸臆此驥之所不忍言而
卒不能已於言而卽爲言之所不能盡者惟先生其默
鑒諸

祭韓旭亭封翁文

代作

嗚呼詩重典型禮隆耆耇寓形有盡立德不朽震澤胥

山人文淵藪於惟太翁篤生非偶學沂崑崙與探蝌蚪
鍵戶霞騫揮毫珠走俛視時髦千金敝帚半生場屋詭
遇所醜天靳其施青燈皓首匪施之靳欲昌厥後三鳳
翩翹一龍螭蟠嶽嶽秋官巖疆疊守粵嶠湘江文翁杜
母華軒閑侍垂魚佩玖玉樹芝田綵衣春酒錫類疏榮
龍章螭鈕諸福大來繁祉斯受黨里誇榮於翁何有秋
風老屋斜陽野叟泉石爲鄰鶴鹿與友陶徑孤松周畦
早韭疇昔釣游水某邱某翁性之豪投壺擊缶翁德之
儉衣麤飯糗人薰其善澆風返厚畱翁百年未爲上壽
胡不憖遺遽驂靈輶以翁制行宜鴈冕綬鳳皇在笈松

栢植嶼巖序蜚聲未盡所負有子克家神其無愀某與
仲君論交杵臼樂樂吟血定繼以嘔寄語吳雲節哀莫
修勉爲蒼生進廢滌垢他日分符虎銅重剖竟翁之志
如農終畝翁雖棄養令名則久二氣轆轤萬象雜糅華
屋邱山贅疣駢拇不用之用元吉无咎顏壽彭殤犇然
可否嗚呼月冷虹橋雲沈虎阜白楊蕭蕭風淒水瀏濡
筆志哀十遺八九楚些商聲椒醕桂醖尙饗

祭王崑圃太翁文

驥嘗驅車齊境未及登泰岱之崇隆亦嘗浮舟河侯未
及涉濟汶之冲融繫登涉之無緣兮猶幸獲侍於先生

長者以開塊磊抑塞之心胸何太翁之不我待兮沅湘
咫尺竟不克一覩其音容計翁之自東而南也道過長
沙者數矣驥以旅食之身若相避然驥之欲謁翁於黔
陽也亦屢矣所欲未遂今幸遂矣而箕尾之騎又不可
以稍延驥於此時不能無憾而翁之貽謀於吾師者則
固毫無遺憾也讀翁之書有澤在手述翁之德有碑在
口行翁之學如鐘待叩竟翁之志如農終畝而吾師猶
以祿養之未遂也泣血而繼之以吐嘔嗚呼龍標木落
錦獎雲寒靈輿旅殯白旆素驂黔之父老既倚杖而流
涕黔之士女復執紼而含酸矧在驥也以通家孫子之

行未遑親炙門下區區之懷其何以自寬

代黔陽紳士祭王崑圃太翁文

邑侯民之父母也父母之於子曰嚴曰慈二者盡之矣
若邑侯之父而就養於邑嚴則導其子爲蒼鷹慈則視
其子爲幕燕二者均失之故古人從政如雋不疑之平
反陶士行之封鮒取資於內教者甚多而稟承於庭訓
者絕少惟我崑圃太翁自嘉慶庚申孟春迄本年春季
前後六年再至黔邑黔之人士聆其言論接其風采合
嚴與慈而渾化其迹若忘其爲邑侯之父而太翁亦謂
黔之人士卽吾子之子而自忘其爲邑侯之父也邑侯

香杜先生以翰苑名流屈宰是邑文章政事無一不稟承於庭訓其於文章旣已樹幟辭壇名在海內偶有一字一句之未安諄諄誨之與課黥塾之子弟無異政事之得失太翁絕無一語及之每於平居侍坐時談及古今吏治若者爲得若者爲失無一不與治黥之利弊相脗合而先生亦善承厥志故所施所措罔不洞悉民情生等以文字爲贅接見之日旣久故知治黥之術皆本於太翁而嚴爲邑侯之嚴慈爲邑侯之慈究與就養于邑者無與也嗚呼以太翁詒謀之善爲邑侯撫字之方正宜父享遐齡子登上考永爲黥邑福星乃於前月九

日太翁遽爾逝世黔之人士旣去父母之懷又失大父母之教其悲慘尙可言耶至於太翁早舉賢書文名藉甚屢司縣鐸教士有方生等遠在一隅所聞雖不甚悉卽以太翁在黔所著之詩若文及所以誨迪黔士者推之聞而知不若見而知爲最切也太翁之子昆季六人伯季旣已先亡兩季忽焉繼逝在太翁眉壽令終歡承地下於箕疇五福原無遺憾惟我香杜先生奉老母而神傷撫諸孀而力瘁黔之人士身受嚴慈之澤者見邑侯之不安厥居卽父母之不得其所其將何以爲情謹招儔侶敬奠椒漿惟翼太翁之靈與龍標仙尉靈佑社

神邑爲唐詩人王少伯謫宦之地順治間有殉節周公
神邑人奉爲社神香杜先生請於朝敕封靈伯伯

共往來於斯邑則黔民幸甚黔士幸甚

兩科鄉試舉人公祭王崑圃太翁文

近代稱師之師師之父皆曰太老師而其自稱也皆曰
小門生其稱一也其分同也而其情則有別夫師以恩
義合者也師之師則分尊而恩義疎矣其爲太老師者
和而易接則小門生親之否則途人而已矣若師之父
與小門生固無恩者也以師之恩推而上之猶吾父之
父而不可以稍疎故恩由義起太老師之稱雖同而其
情則以師之父爲最重崑圃太老師吾師香杜夫子之

父也吾師之父及見者分甘點頤固與事已之大父無異一旦失侍奉其哀自有不能已者至小門生散處四方有終身不及一見者聞訃而爲之諫其辭似不能哀然亦視其師之視門生者何若也師之視門生也如子則門生之視太老師也無論及見不及見未有聞喪而不哀者某等以鄉舉中式受知於香杜夫子門下前後凡兩科矣其於太老師皆未及見及聞訃之日無不各致其哀則以吾夫子之於門生其陶成而屬望之者不徒科舉文字之知而性情之感孚於平日有獨摯也至於太老師人品之端方學問之純粹文章之深厚所聞

於夫子者備見於家狀及賓祭之文非未及見之小門
生所能揣測而言其萬一也第卽小門生之所以致哀
於太老師者敬奠一觴魂兮歸來庶幾享此

公祭呂母李恭人文

代作

禮經嫂叔無服推而遠之也唐貞觀中制爲小功五月
而昌黎韓子之報其嫂鄭也則爲之服期爲其爲長年
之嫂遇孩提之叔劬勞鞠養情若所生自不得泥守乎
別嫌之典而視之若等夷惟

旌表節孝

誥封恭人呂母李恭人今長沙府知府

欽加道銜麗堂太守之長嫂也太守少恭人三十歲在懷抱時分飢共寒親愛備至及其長也起居服食如慈母之護嬰兒太守之官於湖南也恭人實偕至焉隨任常德重居郡治憶祖舅祖姑之音容如在而不及長侍也則爲之涕泣漣漣蓋太守之大父曾守是郡而其太翁亦分巡冀寧恭人嘗以隨侍時所及見者易太守故太守所歷諸郡治行卓然人知爲先世之遺澤而莫知爲嫂氏之箴規太守感其拊育之慈教誨之德陳其節孝請

旌於朝又以本身

誥命勲封如例且閔其無後而以長君嗣焉其所以報
恭人者至矣而太守之心猶以爲未盡也則願長分祿
養而迭介乎期頤迺自年近七旬首邱念切攜所嗣歸
里太守雖饋問常通終以檄音之遠隔也故戊戌之歲
藉假暫歸整冠而見亦嘗親奉乎盤匱曾不數年歲在
重光月維夏五訃音轟至太守爲位而哭憂從中來若
無以自解者凡我同僚率屬而唁之曰爲婦爲母若恭
人者可無憾矣又笑生死之足悲恭人之歸於德夫朝
議也年纔十七閱二載而嫠事兩世翁姑敬養倍篤其
爲婦之節且孝有如此者嗣子之官勉以大義及其天

折載育孤孫其爲母之慈又如此宜其享年八十有九
無疾而終允爲

盛世之女師而作東萊之母儀況有太守爲之表章懿
媿庇蔭後昆方之古人鄭仲虞之敬禮甚篤顏洪都之
謁誠至感無以過焉是皆太守能奉太翁之泊命故事
之如母終身不衰然其生也嫂叔之情同於母子及其
旣歿則推而遠之雖眉壽令終略無遺憾揆之至性究
無以塞太守之悲故援韓子服期致報之義敬奠一觴
魂兮有靈其歆鑒之尙饗

祭唐氏妹文

維嘉慶十有七年七月庚辰

勅贈安人唐氏妹之

訃自京師三千里達於家明日辛巳仲兄本驥招魂設
位酌醴陳牲爲文以哭之曰嗚呼慟哉汝稟賢淑之資
蒼蒼者方將昌其年以竟汝之志不應如是之短折也
一紙訃書係汝壻親筆非得於道路傳聞之曰仰視日
車炎炎如炬更非觴致惡夢所能幻造也嗚呼慟哉自
吾父之歿于浙也伯兄九歲余五歲汝纔二歲耳零丁
孤苦賴有母慈以養以教至於成人余兄弟家貧負米
嘗在百里以外堂上肯甘賴汝佐治膝前歡笑賴汝親
承老母嘗欲奇汝不許駟僮子問盟歲甲子汝年二十

有二始字今禮部主事唐受堂爲繼室受堂前妻故有
子女各一手歸後老母嘗以善爲後母訓汝迄今七載
人無間言可謂難已受堂于汝歸之次年計偕北上汝
還母家戊辰受堂成進士選庶常己巳散館改今職汝
念蘊砧遠宦屢欲赴都余勸以長安居不易輒泣對曰
安有嫁女子長以口腹累母家耶遂于庚午二月附糧
艘北發余侍老母送至河下停舟三日依依不舍當時
情景宛在目前從此一艙閉置道險愁長行至中途積
血大作閱七越月始抵京師而汝之病已自此始矣然
尙不知河下停舟卽爲永訣時也時伯兄落第畱京客

中相見兄妹歔歔辛未春闈兄復報罷早知汝有今日
余固不聽汝去兄又肯別汝歸耶汝在家時雖粗識文
字然未嘗脫手作書自運河舟次及到今三年一月之
中嘗接汝親筆數紙蓋欲使老母知兒病猶能搦管也
聞訃前十餘日尙接汝請安帖子追計其時距屬纊未
及半月置硯炕上病骨闌珊不知費幾許呻吟始能成
此十餘字也余館衡郡聞居停有 陛見之行私心竊
喜謂依人奔走骨肉得以重逢孰知行者未遑而死者
已不及待矣汝於六月六日歿於京師前子晉高童年
入泮佳子弟也於六月七日歿於里寓慈護孝竹兩兩

生埋燕楚迢迢同聲一哭汝女阿菊年甫六齡聞汝遺
言欲寄外氏余今年三十有二尙無子女他時歸里汝
女卽余女也嗚呼汝今已矣白頭老母痛不欲生余於
此時難堪已極想受堂官京師對空房而飲泣伯兄客
滬水聞惡耗而傷神其悲慘又當何如耶嗟嗟誰無兄
妹惟我三人幼孤同乳未嘗暫離余兄弟十歲以後貧
難就塾以母爲師偶有童心母輒訶曰若芬告我若芬
者妹名也當時幼稚未嘗不以汝爲多言迄今思之童
年不再荒曠如常兒齒忠言能復得耶嗚呼慟哉尙饗

長物齋文略卷五終

修脯多寡膏火有無不與計也年二十館驥家兄事先
君子先君子亦雅意推許忘賓主迹乙巳秋先君子歿
於浙時伯兄騏九歲驥五歲熒熒無告先生慨然念先
君子交誼之篤撫摩教督欲始終成就之故驥兄弟自
蒙養來未嘗別師一人課讀之外有寸長則誘之遇稍
稍過失呵譴隨及二十年如一日也先生同母兄二皆
力田課俸所入一絲半粟敬奉兄嫂未嘗自新一衣癸
亥丁父憂泣血盡哀附身附棺必使無悔服闋補弟子
員肄業嶽麓書院伯兄遊吳越惟驥負笈相從又二年
驥爲飢驅亦出門下己未先生贅於長沙游氏題其室

曰鴻龜不因人焚者鹿車自愧我刑于其耿介可見踰
三年而藍田雙壁疊產茂叔之庭矣嘗夢人授異書一
帙曰此周書也把玩驚覺僅記一語曰集於麟原名其
長君曰洛書字麟原志祥也壬戌館邑侯蔚寓中偶發
舊疾咯血數升閱半載稍痊而元氣已漸耗矣甲子春
驥館瀏陽瀕行執手諄諄謂秋闈伊邇努力自期毋怠
惰以偷安毋嬉游以荒業痛哉我師烏知卽永訣時耶
六月旣望驥自瀏陽歸驚悉訃音肝腸寸裂嗚呼先生
之視驥兄弟猶子也而驥兄弟病中不克視湯藥歿後
不克視含殮蒼天有極此恨何極耶撫視兩孤其熒熒

無告曾不異先君子去世時而驥兄弟終年旅食未必
能如師之教督十餘年不倦也同學陳君文雅胡君樹
惠樹慈王君定元等十餘人嘗與驥兄弟聯文社先生
去世時驥兄弟不在側祭奠葬埋不愆於禮者諸社友
力也秋闈前十日驥兄弟倡同人公致賻分百金詣靈
一奠鄧南坡胡玉潭諸君子爲之首數日內知與不知
不期而集者百有餘人嗚呼非盛德之能感人耶先生
績學能文章不屑屑規撫時流習氣顛躓名場賣志以
歿病亟時口誦生平所讀書終夕不輟彌留之際兩手
尚作繙書狀嗚呼先生之志可哀已其平居待人接物

胸無城府未嘗有矜驕之色逆億之心故終其身無毗
睚之怨又極儉約嘗訓驥等曰惜物力所以惜福也敝
衣麤粒甘之如飴雖升斗費不肯乞假於人人亦以此
重之生乾隆壬午二月一日卒嘉慶甲子六月六日得
年四十有三卒之三日葬省城南關外之太乙山子二
長洛書五歲次洛誥二歲在孩提中嶄然見頭角矣以
先生積累之厚遺澤之長將來正未可量先生有子先
生不沒也嘉慶乙丑正月晦日受業黃本驥謹狀

誥封朝議大夫太學生李公墓表

乙未仲秋昌江文學李君奉其季父上舍君所撰狀副

以書幣造長沙黃本驥之廬乞爲其祖朝議公墓道之
碣其書曰某耳先生名久矣先子終今八年非大君子
一言傳世其何以爲心望之深而委之重辭益固而請
益堅啟其狀竟讀之慨然曰韓子所謂鄉先生沒而可
祀於社者朝議殆其人也而上舍兄弟子姪又能篤承
其志諄諄以闡揚父祖爲念其貽謀之善世澤之長亦
可槩見因不敢讓而爲之言曰公諱萼字韡實自號集
樓其先世自唐宗室官潭州觀察使者結廬於岳州平
江之岑川里遂家焉曾祖諱世邦祖諱思捍考贈朝議
大夫太學生諱元日皆蓄德基仁鄉鄰稱善士公太學

君之第四子也道光五年以國子生恭遇

覃恩拜封如其子朝議秩配陳氏繼配黎氏贈如例子
三人傳任皆國學生傳早卒保授府同知銜累階至朝
議大夫女三人適巴陵舉人周準國學生王道璋湘陰
胡世緒孫十有二人黼郡廩生黻縣學生次綱純紀綱
緝綜績經綸維孫女四人適任萬晉張仁元字傳玉潤
皆巴陵人一未字曾孫九人鼎泰頤謙晉豐井恒升曾
孫女八人一字巴陵周高騰一字湘陰黃先發餘未字
公以道光八年歲次戊子九月十日卒享年七十有五
明年三月庚子葬於本鄉石垵觜丑首未趾之原自家

世至卒葬見於狀者如此而狀又述其持躬接物事親
教子凡千餘言大要以古人爲師法在今人以爲奇行
於公則庸行也不必書書其爲人所難能者莫如減糶
貸穀焚券卹貧實惠及於里閭爲衆所共見信而可徵
也湖以南連歲被水患岳澧尤甚平江近湖而多山值
無水之歲又易至於旱公歲以穀出貨減其息三之一
斛置木餽入留出掣一守其大父遺法而鐫其籌曰平
心以警司籌者偶值歉歲則減糶以爲里人有穀者倡
於宿逋力不能償者貰之數且逾萬聞有棄婦而償重
債者於已則焚其券於人則代爲償務全其室家而後

三
已卽其人有宿怨以不能自存告或無所歸其周卹亦
與所親等鄉人欲製額以頌解推之惠勒碑以旌橋路
之工則曰是區區者非敢沽名以自伐也嗚呼公留心
經濟之學不能出爲世用以展其才而以素所抱負施
於一鄉視彼齷齪翁持籌握算較量錙銖爲子孫斂怨
者相去固已天壤卽世之扶魏科膺顯秩有父母斯民
之責者席豐履厚往往腴脂膏以自肥聞公之風當亦
愧悔無旣假使十有九布政司治有如公者數千百人
錯置於各鄉各邑之中則風俗不難於大同人心不難
於純厚矣安見鄉里之望非邦國之英而韋布之儒不

有資於

聖朝邦化也哉公平居以讀書自娛顏其齋曰強恕曰
四勿以自勵書法倣歐陽率更謂其如端人正士可以
陶養性情詩文不苟作必爲有用之言凡此皆公之餘
事不勝書然亦可以覘其志趣之所在云公之諸子皆
黎恭人出恭人湘陰士族也治家教子咸得其助故公
能徜徉山水間自號柳溪閒叟數十年無內顧憂者皆
恭人有以宜其家亦公之有以行於其家也不幸先卒
在公若失良友而族黨之婦若女則以爲失嚴師矣其
內行例得附書書訖系以銘曰

天岳嶢嶢汨水潏潏不產芝玉爲俗所珍毓茲人瑞超
軼羣倫軒冕匪樂琴書是親邱園養素黨里師仁王珠
薛鳳萃於一門孫曾繞邨緝緝振振人羨其福公帥以
身屬纊遺訓羣嗣書紳讀書處世曰惟一真陵谷易變
古道長存我銘其壟歷久彌新

秀水文學沈君病鶴墓誌銘

君諱光熙姓沈氏字子咸浙江秀水人病鶴其自號也
少而好游有四方之志年三十二入縣學爲諸生朱石
君相國視學時奇其才旣而棄舉子業幕游西蜀嘉慶
五年溯巴峽浮洞庭而至湖以南越五年復北走京師

西至晉十一年又南旋於湖南在湖南前後凡三十年其客苗疆最久主客之交蔣觀察紹宗最深余始識君於綏陽其後余亦客觀察幕遂訂交稱莫逆焉君爲人真直而介生平不作誑語見不善疾之若讐仇非義之取一介不苟其參謀幕府能識大體觀察所至嘗倚重焉芷江六里民訴於部請撥其地隸黔之玉屏檄黔楚大吏會勘持議未決君爲觀察草牘曰乾隆六十年黔苗蠢動蔓延楚邊而六里獨安堵如故則前人所以議撥未行其成效可見地爲黔楚門戶門戶之設鎖鑰宜在內不宜在外湖南內也貴州外也隸湖南便牘上議

遂定奏改其地爲晃州直隸廳民苗安之贊成觀察之
政多類此及觀察卒官而君亦已老矣寄居道觀不復
別擇所栖其於交游少可而多否故所交不多而多端
人雯山翁闕嵐齒長於君余則少君二十餘歲君兄事
雯山而以弟畜余始終如一日今年春以精力就衰屢
欲遷居余宅心許之而未果旬日前忽咯血盈缶驟至
委頓余往候執手歔歔曰死無所歸惟君能殯我余遂
諾之遂力疾遷焉遷甫四日而卒時道光九年歲次己
丑四月乙酉也享年七十君少失怙恃及壯無子而鰥
遂條然不復以室家爲念人皆曰病鶴真閒雲野鶴也

有吾子及陸君猶能繼其聲而埋其骨余雖不忍銘素
生然亦不能無一言以應吾子之屬素生在長沙時著
有琴律推原一卷數百年失傳之祕旨也吾子嘗爲之
圖矣急宜付梓以廣其傳素生名堅歸安世家子卒年
五十有幾其葬以某年月日銘曰

彼庸庸之富貴身旣沒而名不彰矧茲琴也如風籟之
過耳安能計其人之存亡惟無心於名利者藉一藝以
自藏君霄之傍山曰道場有太初孫氏挂瓢之堂魂兮
歸來與之跨鶴而翱翔自古皆有死吾又奚傷

郴州觀風示

代作

爲觀風事照得昭代崇文之盛特重科名英才嚮化之
鄉端由庠序園橋觀聽無美不收類璧趨蹌有長必錄
况三楚號多材之地權輿觀倚而來南方爲講學之邦
俎豆朱張不墜則人由地傑亦地以人靈矣郴迺桂陽
古郡敦化名區星占分野躔聯軫宿之輝地據上游境
攬衡峯之秀通輿航於百粵瘴雨蠻煙溯襟帶以三湘
芳蘭郁芷洞因鹿至晴翠封雲泉以燕來寒香冽玉固
東南之重鎮而山水之奇觀也惟是金錫簪丹蔚然國
寶梗枏杞梓煥矣人文孟瑄摘華序著昌黎令譽胡騰
護蹕人欣輶轍風清文簡

何燕泉先生

芳標氣壓尚苗妖霧

樸齋

鄭忠肅名塾

偉節忠昭土木行營德業既佩其輝煌文

章尤歸於雅正黃金色日成入藝振羽沈宮袁竹第口

授十篇薰香摘豔明末雖趨於詭譎

國初漸返乎清真矣本州才慚玉笋舊厠詞曹篆握銅

符新權州牧一行作吏雖云鞅掌簿書百里專城敢不

留心物色辛酉歲佐操藻鑑第一者頗擅無雙

解首爲武陵陳

世甲子科監試文垣拔十者何曾失五肱經屢折悔少

作之弗工尾不妨焦務陳言之悉去月評於巨敢爲面

北之師雨化以時請授指南之法蓋以制科之選競尙

揣摩求試之文每多勦襲竊私牙慧無非臆馥殘膏間

出心裁祇是藜羹糠飯甚且蠶叢鳥道鼃擲鯨呿字險
怪而不經轉喉觸諱句倔強而莫制振鼻難馴趨荆棘
以入羊腸厭膏粱而甘鳩羽父傳之子信是韋籛弟受
於師私爲邊笥真慶歷之頑民實金陳之敗子也未丈
章之際有神而規矩之中以巧斂精華於字裏東軌範
於行間氣不動則不靈機不流則不轉行如天馬方驟
雨而馳風矯若神龍亦轟雷而掣電山當斷處陡立危
峯水到窮時忽開別島爭兩國而偏從蝸角小可縱橫
吞九溟而若控牛蹏大能搏捥構思於無可思之地設
想於非所想之間要令作者之興趣橫生能使閱者之

精神煥發則異日

黃扉臚唱佇覩

熙朝鼓吹之休卽此時白屋衡才聊當太史輶軒之採
除將題目發學傳諭外合行出示曉諭爲此諭仰州屬
生童人等知悉卽由學署領取全題限一月以爲期驗
羣材之競爽雲羅高舉新鮮瞻翡翠之毛鐵網宏張璀
璨集珊瑚之樹裴延齡號下水船終高姚洎曹子建如
超山兔能折陳琳將揩老眼看春風桃李之華勿賦遐
心吟秋水蒹葭之什倘多文以爲富迥殊島瘦郊寒亦
一藝之必庸分別王前盧後錢仲文之峯青曲罷的是

仙才宋延清之月盡珠來獨傳盛事欲扶大雅共着先
鞭五色寧迷肯負李程之賦三鞭何惜尙酬皇甫之碑
特示

少日駢文焚草殆盡此嘉慶乙丑爲汪容川司馬代
作道光元年於郴州新志偶見此藁蓋少作之僅存
者仍錄其副今四十四年矣關潤東明府點定拙藁
極賞文章之際一段爲論文要語存之戊申春自記